



UPA 2026/89

4/6-2026

Pipaluk Olsen

Illorsuarmit nuutsitaasimanerinit pissutsit pillugit, najugaqartuusimasut pineqartut inatsisitigut isumannaatumik pineqarsimanerisa qulakkeerpeqarnissaa siunertaralugu, arlaannaanulluunniit attuumassuteqanngitsumik misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuititsineq 2027-mi upernaakkut tamanut ammasumik saqqummiunneqareersimassaaq.

(Inatsisartunut ilaasortaq Aki-Matilda Høegh-Dam, Naleraq)

(Siullermeerineq)

Inatsisartunut ilaasortap Aki-Matilda Høegh-Damip siunnersuutaanut qujanaq.

Inuit angerlarsimaffitsik, nunaqarfitsillu qimattariaqaleraangassuk imaannaaneq ajorpoq.

Illorsuarmiuisimasut, aamma nuunnermi kingorna ukiut ingerlanerini nalinginnaaginnartumik amerlasuut aliasussimanerinit, nalornisimanerinit, pakatsisimanerinullu misiginneqatigingarpagut.

Taakkua oqaatigereerlugit suliaq akisussaassuseqartumik isigisariaqarparput. Innuttaasut isumannaatsuunissaat, atugarissaarnissaallu pingaernerpaasariaqarpoq. Qaqqaq suli sisooratarsinnaappat, tassaarsuaqaratarsinnaappallu oqartussat inuunermik, toqqissisimanermillu illersuinissaminnut akisussaaffeqarnerat politikeritut isiginngitsuusaarsinnaanngilarput.

Naalakkersuisut oqaatigaat, innuttaasut utersinnaatitaanerit inatsisitigut naliliiffigineqareersoq, taavalu nakkutilliineq, kalerrisaarutit, uteqqinnerlu illersorneqarsinnaasumik pisinnaanersoq pillugu naliliinarneq suliarineqartut. Demokraatit isumaat malillugu tassa taanna aqutissaq.

Arlaannaanulluunniit attuumassuteqanngitsumik misissuisitsinissamik kissaateqarneq paasilluarsinnaavarput. Kisianni aamma nuunnermi pisunik nutaamik misissuineq pingaarnertut anguniakkamut, tassaasariaqartoq toqqissisimasumik, illersorneqarsinnaasumillu Illorsuarnut utertoqarsinnaanersoq paasinissaanut qaninnerulersinnaviannigikkaatigut isumaqataavugut.

Tamanna pillugu nukit isumannaatsuutitsinissamut, erseqqissumik qulaajaanissamut, innuttaasunullu eqqugaasunut aaqqiissutissanut atorneqartariaqarput. Inuit uteqqinnissaminnik kissaateqartut unneqqarissumik akissutitsinissaminnut, ersarissunillu sinaakkuteqarnissaminnut pissutissaqarput.

Taamatut oqaaseqarlunga Demokraatit inassutigaat, siunnersuut itigartitsissutigineqassasoq.